

Dolfo Nardini

I nomar de' lot dal ca populeri


Numeri 51-60



tosca

Dolfo Nardini

I nomar de' lot dal ca populeri




Dolfo Nardini




I nomar de' lot dal ca populeri

Numeri 51-60



tosca




Queste sono le dieci Sephiroth senz'altra cosa; Uno, lo Spirito del Dio vivente; due, l'Aria dallo Spirito; tre l'Acqua dall'Aria; quattro, il Fuoco dall'Acqua, cinque, l'Estremità di sopra; sei, l'Estremità di sotto; sette, l'Oriente; otto, l'Occidente; il nove, il Settentrione; dieci, il Mezzogiorno.

Dal libro della creazione (Sepher Jetzirah)

51

E' Fnocl'è e' zinquentun (51).
L'Ilusionesta (51), o e' Prestigiador (51).
E nenca e' Sensitiv (51) ch'e' ved i
Sperit (32). Che spes se t'a n'incontar j
è tot un. Giost Naldi (51) u n'era fnoc e
me a m'l'arcord, quand e' stugleva
l'Alma dla Iulenda, sora e' mangh dla
Garneda (5). Tinca (80), int un Custom
da balarena (85), cumé 'na piturena ad
Becalà (77). Zinquentun e' Stargon (51),
Quel ch'u t'guares cun e' calor dal meni
(51), o Quel ch'e' piomba i virum (51).
Che e' mi Cusen (50) da Znin (66) u j à
ciapè, e la su mama la l'à fat Piumbè
(74). Sora a la Penza nuda (15) j i à
puzè un Caden tot pin ad acua (6), e pó
e' su Zé (5), che nenca lo pó l'era stè
piumbè (e l'à da l'ès acsé, se no u n'va
ben) e l'era nench un Fabar (53) (ch'l'è
mei s'l'è un fabar quel ch'e' piomba i
virum (51)), l'à fat scaldè un pogn
d'Palen da caza (75), int 'na Paleta (24)
ad fer, sora i Carbun (30), finché i n's'è
siult. Pó intent ch'e' geva una quelca

roba, forse un Pater (9) u j à tirat ad bota int e' Caden (18). Coiu! Da che dé, lo i virum u ngn'i à 'vù piò. Però, e u j è un però, lo da che dé l'à sempra 'vù Paura (90) 'd Butes int l'acua (7), e u n'à Imparè (21) ad Nudè (11). Ch'i dis che pó i piumbè, dop, i s'Afoga (60), pr e' pes ad tot che Piomb (31) che j à int la Penza (86). Zinquentun e' Lebros (51); la Spala rota (51); Guarì (51); Stirés (51), e nenca a Benedì (51). Zinquentun, l'è Quel ch'e' scor nench senza arvì la boca (51); Strachès (51); Caschè (51) par tera, propri cumé un Sach svuit (51). Zinquentun e' Sampagn (51), che l'è piò bon l'Albena (51). Zinquentun a Béi daglj ovi (51). Zinquentun a Scavè int la busa dla miniera (51). Zinquentun la Merda di sorgh (51). Zinquentun Ciapé di s-ciafun (51).



52

Zinquentadó, la Basamarea(52);

Stuglès (52); Ciapè e' sol (52) a Ziznatch; Coi dal capi (52), mo no al Purazi (25) ch'al fa vinzenqv e aglj è boni da magné. Zinquentadó u l'fa la Tropa cota (52); che la n'è miga pó da Buté via (30). Zinquentadó, u l'fa e' Ras (52) di fasesta; e' Zop (52), quel ad Melarenza (22), cun una Gamba ad legn (44), che l'era un gran Fasesta (35), nenca lo. Zinquentadó e' Randel (52), ch'e' Manganel (46) e' fa quarentasia. Zinquentadó l'è nenca l'Arughent s'l'è bastunè (52). Zinquentadó, e' Carnevel (52); e' Totocalcio (52); la Sgnorena in cisa (52), e enca a Sburé (52). Zinquentadó l'Arsenich (52); a Vlèi

ben a la mama (52); la S-ciopa (52);
e' Zé (52), e i Zé (52); a Scavalchè
(52); al Cherti da zughì (52); i Calzun
arvultè (52). Zinquentadó, e'
profesor ad erti (52); e' Scultor (52);
la Galeria dal stetui (52); la Zera
siolta (52); qualquel ch'u s'Asarmeia
(52); i Sint, si è pituré (52).
Zinquentadó u l'fa a Viulè dal doni
(52); Rubé al robi int la cisa (52); i
Taditur (52). Abandunè la moi (52),
zinquentadó; mo nenca cun la moi
a Fè la pesa (52). Zinquentadó la
Pala de' biglierd (52); a Guarì da la
fevra (52); Scapè d'int e' casen (52);
a Surnicì (52); a Spedì (52).



53

Zinquentatré,
la Gruvata(53),
mo sol s'la è culureda; la
Gentileza(53); e' Fabar (53);
Cavè i fer a i caval (53).
Zinquentatré e' Guadagn
(53); a Fè un debit (53); a
Dè indria di baioch ch't'a j
avita in prestit (53).
Zinquentatré, u l'segna e'
Rasunir (53); la Caldera
(53); e' Genereli mort (53);
'Sfisiè cun e' carbon (53);
e' Bei muschè (53); e

nenca l'Umor bon (53); e'
Prit di ebrei (53); Sturdìs
(53); Stravinz (53); e' Sach
(53) o i Sach (53); a Rudè i
curtel, quii da mazler (53);
al Trezi d'ai (53); a Infilzé
al ranoci (53); l'Incontar
(53); Quel ch'u t'saluta (53),
e' Vapor de' mer. (53)



54

Zinquentaquatar,
la Mama (54),
la mi Mama; i Vicioni (54), e pó
u l' segna e' Capel (54).
Zinquentaquatar e' nir (54), e i
Bus de' nes (54). Zinquentaquatar
la Nira (54), e e' Burdel mort (54).
Zinquentaquatar la Nafta (54), e i
Fucilé (54). Zinquentaquatar l'è
Quii ch'j i cred (54), e pó nenca
e' Fraton (54). Zinquentaquatar e'
Cuntanden ch'e' lavora (54), e e'
Pen salè (54). Zinquentaquatar la
Caza (54), e a Lavurè tramez i
bosch (54). Zinquentaquatar
l'Ardì (54), e la Bomba a men
(54). Zinquentaquatar a Invidé
(54); a Brevetè (54); a Curé (54),

e' Fer eletrich da stiré. Giazés
(54), e nench Giazé (54). La
Muntagna (54) la fa
zinquentaquatar. Zinquentaquatar
la Giaca arvulteda (54); Cumprè
de' bei (54); la Cherta (54); la
Zaneta ad bambù (54); e' Cal
ch'e' fora (54). E pó,
zinquentaquatar, Quel ch'u
n's'capes gnench quel ch'u
s'voia di (54).



55

Zinquentazenqv u l'fa e' Mèl int i dint (55).

Ch'u n'e' pruves un Chen (6)! Che e' fa Paura (90), cmé avdéi un Mort ch'u t'dis ch'u t'ven a tó (55). Zinquentazenqv l'è nenca e' Dent che e' scrola (55), ch'i à sempra Det (5), l'è vera, ch'l'è un Brot (2) Segn (74), e un Brot segn (76) e' segna stentasia. Zinquentazenqv, Pasè e' fiom (55), e nench Pasè l'Esem (55); Stè só da tevla (55), e nenca Alzè la men (55). Zinquentazenqv, u l'fa a Ciud la persiena (55); Pistè (55) un qualquel, ch'e' sipa nenca un Stronz (55), ch'e' fa zinquentazenqv nench da par lo. E l'è zinquentazenqv sia ch'e' sia Un (55) o ch'e' sia un Pez ad merda (55), ch'l'è precis. Zinquentazenqv, la Cugneda (55); ch'la è sempra cun l'Urecia a lè int la porta (55), e pó la Zura e' fels (40). "Zur (27) ch'u n'è vera!". Va là, cmé i dis a là a Lunzen (55), me a n'stagh a Impalè al vidi (55) si Salem (33). Che l'è i Salam (33), par quii ch'i n'è ad Lunzen. Va là che un dé me a Stagh só d'int e' let (55), a Toi un cafè (55), e pó a m'vagh a Cumprè 'na bicicleteta (55). E via! Ch'a vagh al Termi (55) o fina a Ongh Congh (55). Via da st'al Figghi smesi (55). Da st'al Veci (89) Tarledi (55), fioli 'd Banchir falì (55). Ch'a s'met indos ancora di Vstì 'd seda (55), dal Fili 'd perli (55), e sora dal Capeli (55), ch'e' pè aglj Atrici a sora de'

pelchsenich (55). Me a sarò un Ors (55) ch'e' Sbrogna (55), mo a sò Afabile (55). A n'sò cmé zerta zenta. Malandren (55)! Però a que Parsunir (55) a ngn'i stagh piò. E' basta a Ciapè al Frustedi (55), a és Maltratè (55). Magari a m'Begh un vlen (55), o a m'vagh buté d'e' molo a là a Ziznatich (55). E pó a sò Lebar (41), cumé un Anzul ch'e' vola (55), cmé ch'l'anzul che t'al vè sora a San Roch (17). Zinquentazenqv, la Dona ch'la va in machina (55). Zinquentazenqv l'è nenca l'Inzident (55). Zinquentazenqv, l'Imbutida (55); la Mastela in du ch't'fasita e' bagn (55); i Fiur de' zris (55), e pó l'Urcin d'arzent (55). Zinquentazenqv a Lavès la camisa (55); L'Aula dla scola (55), u l'fa la Filastroca (55), quela ch'la m'geva sempra la mi Ma (54) "Sdanteda (54), sdanteda / Porta (66) la Merda (71) int e' Marché (63) / porta la mia / porta la tua / porta quela di tu Bua (54)".



56

E' Cinema (56) e' fa zinquentasia.

Nun andami da Gisto, dria e' Pont nov (23), d'Isteda (32), cun tot al Steli (4) de' zil sora a la testa, che a guardeli pó l'era mei de' Cinema (65). Du ch'u j era ona Bionda (56), cun al Calzeti zali (56), e un Capel gris (56), fat ch'e' pareva d'avdéi 'na Merda ad vaca (56); e un Biond (56) cun la Divisa (63). Un Duganir (56). Che cun la scusa d'un Bigliet de' tram (56) e' prova d'Imbruchela (56), e la i va ben! Che dop pó lia la i Dmanda da Fumé (56). Robi che sol a e' cinema al Suzed (59)! Che a me, cun l'Oc cativ (56), la m'avreb det "Va là. Va via brot Gnescul (56)! Va a Plè di usel (56) a là cun i Zulù (56)!". Che pó a n'sò ghenca un Diescan pituré (56), e in Frenza (56) a putreb Fè la mi figura (4). Ch'a n'ò miga la Poza (56) d'una fogna, o l'Ussel circuncis (56) cum i à j Ebrei (43), e ghenca i Cavel (55) unt ad Margherina (56). Va là, Guardem (33) e' cinema ch'l'è Mei (37), se no a m'Invlen (56) e' Sangv (18). U s'ved 'na fila ad Pelmi (56), dal Muntagni

(56), pó una Masa d'usél (77), ch'l'è Faraoni (56), e pó di Oman ch'i béi (56). Tot cun la faza da Meridionel (56). E lia, ch'la è quela ad prema, ch'la va, ch'la Cor (39), la Rozla (56), cmé 'na Cavala mata (56). E pó di dria u s'ved tot un Inzendi (56)... L'è un Deposit (56) ch'e' Brusa (30), cun un Bancon da sert (56), dla Roba vecia (80), dal Gheibi d'animeli (56)... E lo, l'Eroe (56), in du èl? Ah! Lo. L'à fat un Sbai (56). I l'à Imbruì (56). L'è lè cun un malè, a lè ch'u l'Beda (56), cun un Catar (56), ch'u s'sint ch'l'è par Murì (14). E pó, a lè cun e' mort u s'ved un Frè (56) ch'e' Paciuga (88). U i Darà l'oli sent (56)? Mo e' lo, csa fal a lè? L'è un Incusient (56). Che lia la è là ch'la cor e la è Indifesa (56). Però pó e' fines ben che ch'e' Cativ (61), l'armenza Tinch (80) ch'u l'Ciapa 'na saeta (56), e lou i met só Fameia e j è felici (56). Sti Cinema(65)d'Incua(16)j è totPrecis (83)!



57

Zinquentaset e' Gob (57).

Bona notizia (57)! Ch'l'è un bel Avdèi (7) parché e' porta Furtona (90), cumé la Merda (71), piò d'ona Cariteda (57). O cmé avéi un Broz 'd baioch (57) ch'l'è zà furtona. Zinquentaset e' Badil (57). Ch'u s'e' tiret Pandoia e' Cavaler (12), quand a entresm a l'Ipodromo (6), d'ad dria, du ch'u j è al Stali (59), e pó Via ch'a ciapesum (73), e a s'a Masesum (85) só pr ona Schela ad legn (58), lé in Du ch'i tin e' fen (35). Pó e' paset un ch'e' purtet via la schela, e nun, che pó a n'putami scalè zó, armanzesum a lè, ch'a parema dal Semii int un gabion (57). A lè fin a la Sera (65), quand i Arpurtet (77) la schela. E nun zó. E via! E a s'Infilesum (26) da e' Cuntaden (82) lè 'd dria. Che pó cun nun u j era enca e' su Fiol (50). E u j era i Zris ch'j era tot fiurì (57). Zinquentaset, e' Danton (57) cum l'era Mevar. Che Diga u i geva sempra che da Grand (23), l'avreb fat e' Dantesta (37) e s'u l'ciapeva, prem quel

u j avreb Cavè chi du dantun (51). Zinquentaset, la Neva zó par tera (57), che la Galena (57) la s'Agiaza (36) i Pia (77). Zinquentaset, e' Capon, mo quand ch'l'è a les (57); e' Rosoli (57); e' Fond 'd seda (57); e' Mudaion (57). Ziquentaset, e' Pastor (57), e e' Pigurer (57); e' Rudaren (57), e e' Magazinir (57). Zinquentaset, i Dunzel de' cumun (57), Tot Vagabond (74), che quel u n'è un Imstir (57) par zenta onesta. Zinquentaset l'Agnel (57); la Mimosa (57); a Dizirì (57); e' Gramiil ricamè (57); e' Fer infughì (57). Zinquentaset, i Tistun (57); e' Rastrel (57); la Brasula ad videl (57). Zinquentaset, che Zerc, ch'i tin i Sint sora a la Testa (57). Zinquentaset, a Fè di Gargarisum (57); a Mnè (57); al Zrisi niri (57); Cuprìs (57); l'Incanteda (57), e l'Incantè (57).




58

E' Zinquentot l'e' in
du ch'e' sorze e' sol (58).

Du ch'e' tramonta (39) invece,
trentanov. E' Mezdé (12) dog, e
nov e' Melcanton (9). Zinquentot
u l'fa a Splì di baioch (58); a
Smadunè (58); Dè 'd mat (58); a
Imbariaghìs (58). Zinquentot l'è
Quel ch'u n's'pantés mai (58).
Zinquentot u l'fa e' Catram ch'e'
bol (58); la schela ad legn (58); la
Sola (58), ch'la ngn'è piò.
Zinquentot l'Articioch (58);
l'Interesè (58); Bulogna (58); e'
Melsarvì (58); e' Batagljon (58), e'
Frach (58), e nenca i Frì (58).
Zinquentot l'è la Sfrombla (58);
Quel ch'l'à l'esma (58); a Basè
un oman (58), che quel a me u

m'Fa Schiv (42). Zinquentot, l'è a stè a Dì d'mèl ad un (58), che la Busia (71) invece la fa stentun. Zinquentot, e' Cunfet purgativ (58); l'Imperador (58); la Tomba (58); l'Arestè (58), che forse u i farà bon la Lima a fer (58); Quel ch'e' dà i nomar da puté vinz a e' lot (58); i du ch'i s'sposa e' dé de' spusalizi (58); e' Nod zó par la gola (58) che l'à lo.



59

Zinquentanov, la Zola (59);

la Cosa (59), e enca la Pesa (59); la Fardason (59); a Sudé fred (59), e pó e' Dutor ad turan (59). Zinquentanov, u l'fa la Mela cota (59); la Minestra ad fasul (59); a Profumés (59); a Entrè in ca (59); e' Ves di fiur (59); Izacarès (59). Zinquentanov, l'è la Gratamariana (59); un Fes-c ad dona (59); e' Bigljet d'auguri (59); la Spela pr i cavel (59); la Pepa d'os (59); la Stala (59). Zinquentanov, la Strolga (59), l'imstir ch'l'era dla Zopa (49). L'Iris, che a nun Babin (11), sol a dmandèi, la s'Buteva di boch spech (26) da la finestra. Zinquentanov,

l'Esauriment nervos (59), e pó e' Calment (59). Zinquantanov, l'Itagljen (59) o l'Itagljen (59), trenta l'Itaglja (30), che trentot u l'segna j Itagljn (38). Zinquantanov e' segna a Fé di debit (59); la Machina da cursa (59); e' curidor (59). Zinquantanov la Crisi intlapuletica (59), e Quel ch'e' magna fino a che ch'u n's-ciopa (59). Zinquantanov, la Poza (59); i Duganjir (59); al Chertifelsi (59). Zinquantanov, la Prova in tribunel (59); Quel ch'e' cunfesa (59), che a e' dé d'incua u i n'è puch! Zinquantanov, l'è la Bandira nira (59). Zinquantanov, un Bosch pin d'asasen (59).




60

Senta l'è l'Os-cia (60).

Ch'l'è l'Os-cia de' Signor (33), o l'Os-cia ad Dio (90). Chi è un e du insem, enzi j è tri: e' Ba (8), e' Fiol (50) e nenca e' Sperit sent (90). Una Culomba (24). E e' fat ch'i sipa Tri e insem sol un (90), Ciou! L'è un Misteri (71)! E 'd quest u n's'pò dì gnint. E nenca l'Os-cia pó, la pè un biscot e invece quand la è in Boca (80) e' guenta Cecia (80), la cecia de' Signor. Quest l'è un Mirecul (66)! Senta, e' Sol ch'e' tramonta (60), e e' Zigh (68) ch'u n'e' pò Avdèi (7); l'è Coi di sas (60); l'é la Putena nuda (60); la Vagabonda (60) ch'la n'à voia 'd fè gnint; e' Sert ch'e' taia (60); e' Misile (60); e' Recint (60). Senta, l'è la Minestra (60); e' Schert (60), e la Presion (60); la Predga in cisa (60); i Diival (60), e la Fucilazion (60). Senta, l'è la Sardela

(60); e' Fes-c (60); i Mataraz (60). Senta, e' Io iò (60); e' Zlè a e' caffè (60); e' Bucion (60); Fè e' calzuler (60); la Bota de' baston (60). Senta, Ruzlé dal boti (60); Taié e' furmai (60); e' Fiol ch'u s'è 'Fughè (60). Senta, la Poza in boca (60); la Voipa int e' puler (60), e' Sorgh s-ciazè (60). A Perd l'anel (60), l'è senta. Avéi al piatli (60); a fè da magné mel (60). Senta l'è a Béi e' te (60); a Ipnutizè al ragazi (60); a Vaciné i burdel (60). Senta j Argnun (60) ch'j è bun cot cun la Seda (8); Patì de' fred (60); e' Fazulet ad seda (60). Senta, l'è e' Fazulet (60) se t'é la Fardason(59). Senta, Sfidé e' pericul (60), ch'u t's'elza la Presion (60).



Il costo del volume è
di 20 euro

E' possibile farselo inviare
richiedendolo alla libreria Bettini
di Cesena (0547-21634)
senza ulteriori spese di
spedizione



© 2007 Tosca
Via Verghereto, 44 Cesena



tosca è associata a viaterrea
www.viaterrea.it

Se un l'è e' Sol, nuventa la Paura
chiùtar utentot i è ancora da truuvè
mo i darà fora, te no' 'vé paura
no' 'ndè s dmandéi in zìr
da reta a me

